



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

Tir Yimym

tiryimym@aolima

tir yimym

TAPAK 8

**PM Modi leniba nung BJP national executive senden amen**

**Nick Kyrgios Australian Open nung masayatsü**



VOL. XX NO. 95 (ADOK 95)

DIMAPUR

SANGTENNÜ (TUESDAY)

ANEJETI (JANUARY) 17, 2023

₹ 5.00

## Lanusunep aser Temjen Imsong na nem Good Samaritan Act award agütsü



(Abelen nungi) Pastor Lanusunep, Dimapur DC Sachin Jaiswal IAS aser Temjen Imsong.

**Dimapur, January 16 (TYO):** Hombarnü Dimapur DC office chamber nung Deputy Commissioner, Sachin Jaiswal, IAS-i Luyim Ao Baptist Arogo nung pastor, P. Lanusunep Jamir aser Temjen Imsong nati yaküm July 2 nü Kohima-Dimapur Highway nung gari lendong ajururtem meima tasütait mapa inyaka yariba atema tenüngsang agütsü.

Road Safety Committee

tenüng nung Committee Chairman, Sachin Jaiswal-i tena nem state Good Samaritan Act Award agütsü aser maneni temiem mapa inyaksü ajungshia liasü.

Iba jakdang Nagaland state sorkari Ministry of Road Transport & Highways of India danga tena nem National Good Samaritan Act Award agütsü tenüng benoka documentary-a ka renemer yoka lir.

## State 9 elections nung BJP-i takok angutsüla: JP Nadda

**New Delhi, January 16, 2023 (Agencies):** BJP-i Hombar nungi anogo ananü strategy session ka tenzükogo aser iba ya taküm state 9 nung assembly elections agütsü dak rangloker agir, kechiyong taküm elections ya 2024 Lok Sabha elections atema semi-final ama züngshir.

Iba national executive senden nung Prime Minister Narendra Modi adener. Pa den külemi Union Minister 35, Chief Minister 12 aser region balala nung tekolakpur 37 adener. Maneni party züngsem 350 shi adentsü imlar.

Tanü senden nung BJP president JP Nadda-i Assembly elections 9 nung BJP-i tokteptsüba aser ka nung danga tamakok mangutsü indang jemi.

"BJP president Nadda-i 2023 ya kanga tongtipang ta ashi. Onoki item elections nung takok angutsüla aser iba sülen 2024 general elections nung takok

angutsüla ta pai ashi" ta BJP lennir Ravi Shankar Prasad-i ashi.

"Prime minister-i asenok tashimaitba booths nung tashi aittsü atema inyaksü ayongzük. Tesüiba mapang tashimaitba booths 72,000 jangjaogo. Tanü BJP president-i booths lakh 1.30 tashi tashi itshiba indang ashi" ta paisa metetdaksü.

BJP president Nadda-isa tawa agiba elections indang jembidang Gujarat nung otsütsü süa takok ngutetba indang ashi.

Nadda-isa Himachal assembly elections indang ashidang 'asenoki sorkar melenba sobaliba melenshitsu merang saka ibaji meinyaktet' ta ashi.

Tanü National Executive senden nung India nung mobile, car manufacturing jenjang tajungba akümba, Vande Bharat trains tenzükba aser rongsenketzung tsütsü United Kingdom ajangtetba indang onüktem jemi.

## Dr. S. Imkong Tushi alima nungi pilaogo



Dimapur nung taoba Nagaland Medical Director, Dr.S.Imkong Tushi Ao alima nungi pilaogo. Pa arishi küm 88 liasü. Pa ya Indian Medical Association, Nagaland akümer rongnung ka liasü. Pa mapa nungi anener külena, pa NPSC nung Acting Chairman tashi inyakogo.

Pa den asüpila sentep sentong Naharbari, Dimapur nung January 17, 2023 anepdang 9:00 ako nung alitsü renema lir.

**Dimapur, Jan.16 (TYO) :** Mapang talangka temang menjungi arur, Hombar anepdang

## Coronavirus vaccine tem nung side-effects aika lir

**Mumbai, January 16, 2023 (Agencies):** Küm ana nungi India nung Covid-19 vaccines agüja aruba nung 'side-effects' aika lir ta Indian Council of Medical Research (ICMR) aser Central Drugs Standard Control Organisation (CDSCO) ajanga metetdaksüogo.

Pune nung shishilembar Prafful Sardar-i RTI agütsüba atema telangzüba nung ICMR aser CDSCO-i iba telangzüba agütsü.

India nung AstraZeneca aser Serum Institute of India, Pune indang 'Covishield' aser SII indang 'Covovax' vaccine amshitsü mela. Iba sülen sorkarisa Bharat Biotech Ltd. indang 'Covaxin', Dr. Reddy's Lab indang 'Sputnik V', Biological E. Ltd. indang 'CorBEvax' aser Cadila Healthcare Ltd., Ahmedabad indang 'ZyCoV-D' vaccines amshitsü temelaba agütsü.

Item vaccine atema Prafful Sardar-i side-effects indang metetnua asüngdangdang ICMR nung PIO Dr. Leyanna Susan George aser CDSCO nung PIO Sushanta Sarkar nati vaccines ajanga khuret timtem balala agütsüba telangzüba agütsüogo.

Covishield: Vaccines

rongnung timtem teimba agütsüba Covishield lir aser iba ajanga temang nung timtem aika agütsü.

Covishield ajanga timtem agütsüba rongnung karji, kanga saksür, tepok nung tashitsü atur mesüra tekolak angor, tango mesashipur, teku ashir, tetsüng-teben ayanger, tatutsü atur, tenük ashir, tenük agi junga mangur, tekolak belensaba lir.

Covovax: Ano, Covovax agirtem kanga anibelemar, tekolak angor, temang metar, muscles ayanger, tenük-telen nung tashitsü atur, saksür, temang mokonga akümer, temang ngoyangoshir mesüra tetsüng-tebang nung tashitsü atur, injection agidak komo adoker, teberem ashir, mangmanger mesüra anünür.

Covaxin: Covaxin vaccine ajanga tekolak angor, anibelemar, temang ngoyangoshir, tepoklang nung tashitsü atur, saksür, mangmanger, temang atentener, asentzü alur, asüker aser aketer.

Sputnik V: Sputnik V vaccine ajanga asükjang moronger, temang meta shiranger, tekolak angor, injection atudak ashir/awaker, mesüra saksür, achiajem mesünür.

CorBEvax: CorBEvax ajanga

temang meta shiranger, tekolak angor, anibelemar, temang ayanger, saksür, injection atudak komo adoker/awaker.

"ICMR-CDSCO ajanga telangzüba agütsüba taoksatsüka lir. Sorkari vaccine agütsüba ya pei mulung ta sangoktsü saka bus, train, tayimtsü nung vaccine magirtem mesenzüdaksüi noktang aser iba ajanga nisung aika vaccine agütsüba aküm" ta Prafful Sardar-i ashi.

Paisa sorkar dang media, hospitals aser vaccination centres ajanga side-effects indang osang shitak prokshitsü asü masü ta metetnua asüngdangdango.

India nung Health Ministry ajanga vaccine dak sendakba public safety campaigns agi asü magi ta paisa asüngdangdango.

India aser alima tesem balala nung vaccine agiba ajanga nisung aika asüba osang nung ajemdaker Sardar-i iba RTI ya agütsü.

Mezung nungbo vaccine ajak angati agütsü saka August 2022 nungi Centre sorkari Covishield aser Covaxin ayoktsü temelaba agütsü saka Sputnik V aser CorBEvax vaccine tembo 'restricted emergency use' nung lir ta RTI telangzüba nung shia lir.

## ENPO-i Assembly election nung shilem magitsü tuyur

**Dimapur, January 16, 2023 (Agencies):** Eastern Nagaland Peoples' Organisation (ENPO)-i parnok kübok kin hohotem dang state balaka mangu tashi Assembly election campaign nung shilem magitsü tetuyuba agütsüogo.

"Tang tashi nung Eastern Nagaland nung kija mesüra yimtsüng nungi state Assembly

election nung shilem agitsü renemba osang kecha mali. Yimya agi tang mapang yabo yimtsüng teimba ka nung election maparen tenzük alir, ajisüka tanübo election maparen kecha mali" ta lennir kati ashi.

ENPO-i election nung shilem magitsü metetdakjaka aser ano lokti balalai election magidang

yimten latettsü takhangba agüjaka Election Commission of India (ECI)-i kechi südir süaka election agitsü ta shiogo.

"ENPO-i candidate mesangdongtsü aser nüboyimba maparen meinyaksü tuyuba ama Eastern Nagaland district tem nung election indang kecha mejembir" ta lennir kati ashi.

## Netaji nungtem nung Iconic Events Week amongtsü

**Dimapur, January 16, 2022 (TYO):** Netaji Subhas Chandra Bose nem tetushi agüja January 17 nungi 23, 2023 tashi Iconic Events Week amongtsü.

Iba ya Azadi Ka Amrit Mahotsav nung shilem ka lir aser January 17 nü Manipur yimtiba Imphal nung aser January 18 nü Nagaland yimtiba Kohima nung amongtsü.

Iba sülen January 19 nü Haripura (Surat), January 20 nü Cuttack, Orissa, January 21 nü Kolkata, West Bengal aser tatamsa January 23 nü Andaman and Nicobar Islands nung iba sentong tembangtsü. January 23 ya Netaji Subhas Chandra Bose asoba anogo lir.

Nagaland nung January 18 anepdang Phek district kübok

Chesezu aser Ruzazho yimtsüngtem nung wako atsüketba sentongtem agitsü. Iba yim ana nung alirtemi Netaji kanga menungraa jembir kechiyong Second World War mapang Netaji den INA sepaitemi April -May 1944 tsüngda yimtsüng ana nung mongzüka liasü.

Chesezu nung anepdang 7:30 ako nung Deputy Commissioner-i wako atsüketsü aser Ruzazho nung anepdang 9:00 ako nung Inspector General Assam Rifles (North)-i wako atsüketsü.

Kohima nunga walkathon ka ayonga agitsü aser iba sentong nung NCC/NSS/NYKS, IG kaketshirtem aser Assam Rifles sepaitemi shilem agitsü.

January 18 anepdang 10:00 ako nung Indira Gandhi Stadium

nungi walkathon tenzüktsü aser ibaji Nagaland Civil Secretariat Plaza nung tembangtsü.

Nagaland Civil Secretariat Plaza nung wako 126 salatsü aser iba sülen Nagaland Police aser Assam Rifles ajanga pipe and brass band display alutsü.

Anüngdang 12:00 ako nungi Capital Cultural Hall nung Netaji Subhas Chandra Bose indang painting aser drawing tetoktepba alitsü. Iba sentong nung Kohima nungi school kaketshir 126-i shilem agitsü.

Nikongdang 4:30 ako nung Netaji nem tetushi agüja sobaliba sentong ka agitsü. Iba sentong nung Netaji will aser NEZCC ajanga shilem agitsü. Maneni, NEZCC-isa 'Netaji in Nagaland' ta ser documentary ka sayutsü.

# AKM-i adokba 'Aor Kilung Oset' kaket sayaogo



Padma Shri T. Senka Ao-i 'Aor Kilung Oset' sayatsür külen AKM ketdangpurtem, yimozülurtem aser sentong nung shilem agia adenertem kar noksa nung angur. Mokokchung, 16th January, 2023

**Mokokchung, 16th JAN (TYO):** 'Aor Kilung Oset (Indigenous Household Craft of the Ao Nagas)' ta sür Ao Kaketshir Mungdang-i adokba kaket ka Jan 16 nü taoba AKM tir, Ao Literature nung Governor Award angur aser Padma Shri T. Senka Ao-i AKM conference nung meraketa sayatsüogo.

Pai iba kaket sayaba sentong nung jembidang, AKM-i iba ama alakteta school tashi nung amshitetsüsa kaket adoktetba ya ibai mezüingbuba asütsü aser ibai mera tasen ka lir, ta AKM ketdangsürtem dang pelaba den ano Ao lima anguba naro, konger, Ao kin sobusolemsü aser ano aika lir, itemji tarutsü lanu putu atema kaket küma rizünga yutsütsü ajungshia liasü.

'Aor Kilung Oset' kaket nung alibatem tanü mamshiba aika lir, saka tsüraburi amshiba osettsüset shia nungji tetezü lir, anungji, nüngjakojatem wazüka ayutsübaji tongtibang lir, ta pai ashi. "Akhi tsüraburi amshiba

osettemji tanü amshiang-tamshi, saka o jibo rizünga ayutsü nungdaker, kechiyong item o nungji shisa tarok (philosophy) lir", ta paisa shisem.

Aor atema meshi aser atepji kanga tongtibang kechiyong ibai mezüing riju aser temeshi nükmen lir, yangi tapu aika angazüker/sayur. Tanü Ao oshi sama-a aoba ya atep nung Ao oshi mejembiba agi lir, ta pai kuli kar atishia ashi. Tanü Aor aikati kaket mezüluba ya talisa kaket zülurtem dang sen achiba ajanga lir, iba yagi Aor kaketkeno renlokba nung tetsükdaksü ajuruba ka lir, anungji, "iba mulungsentsü yabo melenshitsuila", ta paisa shisem.

Iba kaket ya North East Zone Cultural Centre, Ministry of Culture, GoI-i senotsü teperi teyari agüja Heritage Publishing House nung menüing. Iba kaket nung yimozülurtemji; tesayur Dr. Lanurenla, tesayur P. Talitemsä, tesayur Repabenla, administrator Sentilong Ozüküm,

osangzülur Sashimeren, Ao Milen yimozülur Akangnungsang aser Dobashi Imolangba parnok ketdangsüba nung züluba lir.

Iba kaket ya tongtibangsa AKM 68 buba inti mungdang Khar nung alidang, Ao oshi wazüka aser rendaktsütsü asoshi küm 10 ranglok mapatong balala inyaktsü bangzüng ka renem. Ibai mapa küma AKM-i "Aor Kilung Oset" dak sentakba nung tetoktepba ka ayong aser yangji AKM kübok unit 18-i shilem agi. Item unit-temi shilem agiba nungi nungdakattem agiteta/bendena teti atema rizünga yutsütsü nükjidong nung adokba lir. Iba tetoktepba nung tetendangertemjia iba kaket yimozülurtem dang liasü.

Iba kaket tobur junga adoktettsüsa NEZCC-i sen teperi agütsüba den shirnokisa lenmang balala ajanga shilem tajung agiogo, parnok ajak dang pelaba AKM tir, Nungdokyanger Ao aser AKM Sobaliba Zülur, Longpozem Jamiri metetdaksü.

Iba kaket nung teratetemji English agia meyipa lir aser iba meyipba maparenji Fazl Ali College Language Translation Centre-i inyakba lir. Iba kaket nung shilem pezüsü lemsar angutsü – mezüingbuba nung yong & arr osettem, tanabuba nung süng osettem, tasembuba nung Merang/Ali/lung osettem aser pezübubaji temeyoktep osettem. Aor kilung osettemji noksa den kechi agi yanglur aser yangluyim dena shia angutsü. Iba kaket ya 69 buba AKM inti mungdang Akhoya yimdak January 18-20 amungtsü lir, idangji ayoktsü, ta AKM ketdangpurtemi metetdaksü.

# School safety and security dak sendakba nung guideline agütsü

**Dimapur, Aenjeti/January 16 (TYO):** Nagaland kübok sorkar aser Private School ajak nung azüingba tanurtem safety dak sendakba nung School Management indang accountability latetsütsü atema School Safety and Security, 2021 dak sendakba nung guideline ka Nagaland sorkari 2022 küm November ita 29 nü sangdongogo, koba sangdongba anogo nungi inyaksangshi

tenzüokogo.

State kübok inyaksangshia aliba school balala (Government/ Private/ KV/ JNV/ CBSE/ CISCE/ EMRS) tekolak ajak dang School Safety and Security, 2021 dak sendakba nung Guidelines copy kaka download asütsü atema metetdaksüogo, koba Department indang website h t t p s : / / education.nagaland.gov.in aser

Department indang Online Education Services Portal <https://dosenl.in> nung angutsü.

School tekolaktemi School Safety and Security, 2021 dak sendakba nung Guidelines tem indang stakeholders ajak nem metetdaksütsüla aser parnok school nung zünga aliba kaketshirtem ajak tekümzüka kübok toktsütsü asoshi inyaksangshitsuila, ta kasa sangdong ajanga metetdaksü.



74buba Republic Day atema renemshitsu asoshi January 16 nü Deputy Commissioner's Conference Hall, Mokokchung nung senden ayongzüka amenba mapang Addl. Deputy Commissioner, Mokokchung, Chumlamu Humtsoe-i o jembiba noksa nung angur.

# Angh-i Mimkut benjung salem lemsatep

**Dimapur, Aenjeti/January 16 (TYO):** Nagaland aser Assam Angh Prof. Jagdish Mukhi-i sangdong ka ajanga Kuki nungertem den Mimkut benjung salem lemsatepogo.

Iba benjung ya Mim (Maize) takok ngua aruba atema tenüngsang agüja amungba benjung ka lir. Benjung mapang Kuki

nungertem-i parnok sobaliba aser libaliro tajungtem saya pelatepa amunger. Iba den benjung ya asürtem biletmeta amungba benjung ka lir.

Benjung amungba mapang Tsüingremi nenok nem anema aliba aser yimji yimjung nung alitsü atema temaotsü agüjang ta sarasademtsür, ta Anghisa lemsatep.

# Dimapur DC-i senden ayongga menogo

**Dimapur, Aenjeti/January 16 (TYO):** Deputy commissioner Dimapur Sachin Jaiswal IAS-i, January 16 nü Dimapur district kübok HOD tem ajak senden ka ayongzüka menogo.

Iba senden ya DC Dimapur conference hall nung amen, kong taruba Republic day amungtsü aliba dak sendakba nung mapa balala indang sensaksema liasü.

Senden nung iba sentong takok nung amungtsü atema

department balala nem mapa balala lemsükjia liasü.

Maneni senden nung DC-i, Dimapur district nung CMHIS registration dak sendakba nung temulung masüba lemsatep aser HoD ajak dang CMHIS portal nung employee tem züngoksemba inyakyimya parnoki achaayangtsü mepeshia metetdaksü, ajita asünungdang employee temi iba scheme indang tajangzüka agitetsü, ta pai ashi.

# Longlen nung 'Divyangjan' tem nem aids aser assistive device tem lemsü



**Dimapur, Aenjeti/January 16 (TYO):** Ministry of Social Justice and Empowerment, Government of India indang ADIP Scheme kübok 'Divyangjan' tem nem aids aser assistive device tem lemsütsü atema 'SamajikAdhikariShivir' camp ka Longleng nung DC Conference Hall nung January 14 nü ayongzüka agiogo.

Iba camp ya Department of Social Welfare, Longleng, ALIMCO aser District Administration Longleng longjemer ayongzüka liasü.

Iba sentong nung TrongdibaTongpi Sangtam, NCS-i o jembi aser beneficiaries tem den sensaksema liasü. District nung tangar memenepe aliba nüburtem atema assessment aser distribution camp ayongzüka katsüba atema pai Social Welfare Department aser ALIMCO nem tenüngsang agütsü.

Trongdiba-isa, beneficiaries tem dang appliances tem ya kanga kümdanga amshitsu mepeshi, kechiyong aids aser appliances tem aliba mapang sen aika intoker, ta ashi.

Sentong nungsa DWO in charge Longleng, Longlang Phom-i, ALIMCO dang tarutsü nung district kübok tesem balala nung beneficiaries tem tali ayimjema iba amala assessment camp tem ayongzüka agitsü mepeshia

metetdaksü.

Kasa mapang nung ALIMCO Officer P&O, Supongwati Jamir-i, taoba küm September ita assessment camp ayongzüka agiba mapang tejangraba tulu sayuba aser lenla ajak nung teyari tulu agütsüba atema District Administration Longleng aser Social Welfare Department Longleng dang kanga pelaba lemsatapa liasü.

Paisa, telangzüba tajung agütsüba ya Ministry-i kanga junga agizük aser ibayongji Longleng District ya linük nung tesem 67 nung 'SamajikAdhikariShivir' distribution programme ayongzüka agitsü asoshi shimba rongnung züngoksema liasü, ta ashi.

Sentong nungsa Suman Kumar- Prosthetist & Orthotist, ALIMCO, aser Jagganath Sahoo- Audiologist, ALIMCO nati devices tem amshiba yimya sayua liasü.

Züngoksema aliba Divyangjan tem nem aids and assistive devices tapu balala agütsüogo, kong Wheelchairs, Crutches, Walking Sticks, Rollators, Smart Cane, MSIED kits, Hearing Aids amala densema liasü.

Iba sentong ya EAC Longleng, Dr. Samuel Akho Konyak-i tepela anküp o jembiba sülen tembanga liasü.



January 16, 2023 nü New Delhi nung Agniveers sepai mezüngbuba batch purtem den Ato kilonser, Narendra Modi-i jembiba sentong nung Defence Minister Rajnath Singh, Defence Staff General Anil Chauhan, Chief of Army Staff General Manoj Pande, Chief of Air Staff Air Chief Marshal V.R. Chaudhari aser Chief of Naval Staff Admiral R. Hari Kumar nunger adenba noksa nung angur.

### PM Modi leniba nung BJP national executive senden amen

New Delhi, Aenjeti/January 16 (Agencies): Hombarnü NDMC Convention Center, Delhi nung Ato kilonser, Narendra Modi mendenbuba ser BJP national executive senden menogo; iba senden nung taküm state 9 nung assembly elections aser sangküm Lok Sabha elections atema asalentong yanglua o lemteptenzükogo. Anogo ananü senden metenzükdang Modi-i Delhi nung roadshow ayongzükka agi. Senden tembangba sülen osangbenertem den jembidang BJP lenir, RS Prasad-i, "BJP Tir, JP Nadda-i 2023 küm ya kanga tongtibang küm ka asüsü aser asenoki state 9 nung elections nung takok angutsü atema inyakba den külemi sangküm general elections nunga takok angutsü atema inyaktsü ta ashi," ta metetdaksü. "Ato kilonser Modi-i, asenoki tashi meiti aliba booths jangjaba sülen item nungji tashi aittsü atema inyaktsüla ta ashi. Booths

72,000 shi jangjaogo aser BJP Tiri booths lakh 1.32 bo ayimjemogo ta metetdaksü," ta paisa ashi. BJP lenirisa, Nadda-i Gujarat assembly election nung takok tulu anguba osang tejangja metetdaksü, ta ashi. Nadda-i, tawa Gujarat Assembly elections nung BJP-i menden 182 nungi menden 150 tashi nung takok anguba ajanga ostü tasen yanglutetogo aser Himachal Pradesh nung party-i tamakok angubaji shilemji 1 dang nungi tajemba liasü, ta metetdaksü. Nadda-isa, "India ya alima nung rongsenkettzüng tsütsü jenjang pongububa nung lir, mobile phones teimtiba yangluba linük tanabuba aser gari teimba yangluba linüktem rongnung jenjang asemububa nung lir," ta metetdaksü. India nung anogo shia highway kilometer 12 dang yanglua aliba nungi tangbo anogo shia kilometer 37

yangludar, ta paisa metetdaksü. Hombarnep Modi-i ayongzükba roadshow ji Patel Chowk nungi tenzük aser convention centre nung tembanga liasü. National executive senden jakdang Union Home Minister, Amit Shah-i, tawa Gujarat Assembly elections nung takok anguba ya state atema dang masü saka linük tesem ajak atema kanga tongtibang, kechiyong iba election osang ajanga Ato kilonser Narendra Modi-i maneni takok angutsü kuli sayur, ta metetdaksü. National executive senden jakdang BJP national office ketdangpurtem, state units nung Tirtem aser organisational secretary tem BJP headquarters nung senden ka mena liasü. Anogo ana senden nungsa sensakertem atema benokba welfare schemes takok ngua inyakba asadangtsü aser Centre sorkari inyaktetba mapatem sangdongtsü.

### AAP-i Finland nung tesayurtem training agidaksütsü akhanger

New Delhi, Aenjeti/January 16 (Agencies): Delhi sorkar school tem nungi tesayurtem Finland-i yoka training agidaksütsü sentong nokdangba anema Hombarnü AAP tongti aser Delhi Chief Minister, Arvind Kejriwal leniba nung AAP MLA temi Delhi Lieutenant Governor, VK Saxena indang office tashi oa longkak aitogo.

jembidang Kejriwal-i, "Chief minister, deputy chief minister aser MLA temi LG ajurutsü atema gari lenmang nung atatsüsa akümba ya tesasatsüka lir, ajüsüaka LG-i onok ajurutsü memelung," ta metetdaksü. Paisa, Saxena-i pa kija melung agi telemtetba agitsü makok, ajüsüaka pai yamaji inyaker, ta aitsü. "Yimtenren tsütsü nungi Delhi LG-ibo, iba ama telemtetbaji magi, ajüsüaka Delhi LG-ibo, iba ama telemtetbaji magi, ajüsüaka tajangzük anguba aser sen teindokba asadangba report agüjang ta dang tuyu, ta shiogo. Osangbener den jembidang AAP tongti, Arvind Kejriwal-i, "Iba sorkar ya Delhi nüburtemi shimtetba sorkar lir. Iba ya Delhi nung alirtemi agütsüba saru sen lir aser ibaji Delhi nung shisaliok atema lir. LG-i kechi timtem ajurur?" ta asüngdang. AAP MLA tem jagi "Mr LG, tesayurtem Finland-i yoktsü temelaba agüjang," ta ozülü amer liasü. Delhi assembly senden tembangba sülen AAP MLA temi longkak aita LG office tashi ao. Kejriwal leniba nung MLA temi Vidhan Sabha nungi kilometer ana shi jaja longkak aita aoba mapang LG office atongtsü metre ishika dang lia police-i parnok nokdang. Osang angazükba agi, LG office-i shidi ka ajanga Kejriwal dang Saxena-i pa den Deputy Chief Minister, Manish Sisodia na ajurutsü melunga lir, ta metetdakja liasü. Ajüsüaka Kejriwal-i, iba senden nungji adentsü atema MLA tema jaoktsüla, ta akhanger. Police-i parnok nokdangba sülen Kejriwal den MLA tem assembly-i meyipa ao. Tesülen osangbenertem den

Delhi LG-ibo, iba ama telemtetbaji magi, ajüsüaka tajangzük anguba aser sen teindokba asadangba report agüjang ta dang tuyu, ta shiogo. Osangbener den jembidang AAP tongti, Arvind Kejriwal-i, "Iba sorkar ya Delhi nüburtemi shimtetba sorkar lir. Iba ya Delhi nung alirtemi agütsüba saru sen lir aser ibaji Delhi nung shisaliok atema lir. LG-i kechi timtem ajurur?" ta asüngdang. AAP MLA tem jagi "Mr LG, tesayurtem Finland-i yoktsü temelaba agüjang," ta ozülü amer liasü. Delhi assembly senden tembangba sülen AAP MLA temi longkak aita LG office tashi ao. Kejriwal leniba nung MLA temi Vidhan Sabha nungi kilometer ana shi jaja longkak aita aoba mapang LG office atongtsü metre ishika dang lia police-i parnok nokdang. Osang angazükba agi, LG office-i shidi ka ajanga Kejriwal dang Saxena-i pa den Deputy Chief Minister, Manish Sisodia na ajurutsü melunga lir, ta metetdakja liasü. Ajüsüaka Kejriwal-i, iba senden nungji adentsü atema MLA tema jaoktsüla, ta akhanger. Police-i parnok nokdangba sülen Kejriwal den MLA tem assembly-i meyipa ao. Tesülen osangbenertem den

Delhi sorkar mapatongtem metetsümonga nokdang. LG ya onok homework reprangtsü atema ozü headmaster masü," ta pai ashi. "Nüburtemi shimtetba sorkar dak tashi melira sorkari komaser mapa inyaktetsü? Kechiba ozü tesayurtem Finland-i aotsü atema pai nokdang?" ta paisa asüngdang. "Finland nung shisaliok inyakym tajungtiba lir. Onok yangi atatsü aser asen chirnur tarutsü tia atema onoki raratsü," ta paisa metetdaksü. Anogo ishika tejaklen Delhi Deputy CM, Manish Sisodia-i Delhi LG aija, LG-i tesayurtem training agitsü atema Finland-i yoktsü memelaba ya AAP sorkar indang "education model" anema inyakba mapa ka lir, ta aija liasü. Iba mapang nungji Sisodia-i, "LG Saxena-i CM aser Education Minister-i agiba telemtetbatem agientsür, aser ibaji ajanga Delhi nung tanurtem takoksa angutsü," ta metetdakja liasü. Finland nung aliba Jyväskylä University nung Delhi sorkar school tem nungi tesayurtem anogo pongunü training agitsü atema renema liasü. Iba University ya Finland nung University tajungtiba lir aser alima nunga jenjang 40 buba nung lir.

MINISTRY OF HOME AFFAIRS Government of India | G20 2023 | 75 Azadi Ka Amrit Mahotsav | NEZOC | **JOIN THE CELEBRATIONS PROGRAM SCHEDULE**

- HOISTING OF NATIONAL FLAG Chesezu Village, Phek District | Time : 7: 30 am
- HOISTING OF NATIONAL FLAG Ruzazho Village, Phek District | Time: 9:00 am
- WALKATHON From Indra Gandhi Stadium, Kohima to Nagaland Civil Secretariat Plaza, Kohima Time : 10: 00 am
- UNFURLING OF 126 NATIONAL FLAGS FOLLOWED BY BRASS AND PIPE BAND DISPLAY BY NAGALAND POLICE AND ASSAM RIFLES Venue : Nagaland Civil Secretariat Plaza, Kohima Time: 11: 00 am
- PAINTING AND DRAWING COMPETITION ON NETAJI SUBHASH CHANDRA BOSE Venue: Capital Cultural Hall, Kohima | Time: 12:00 noon
- CULTURAL PROGRAMME Venue: Capital Cultural Hall, Kohima | Time: 4-30 pm

कदम कदम बढ़ाये जा

Commemorating **126<sup>th</sup> Birth Anniversary of**

# NETAJI SUBHAS CHANDRA BOSE

GRAND CELEBRATIONS | 18<sup>TH</sup> JANUARY 2023

PHUK - KOHIMA

PARAKRAM DIWAS | 23<sup>RD</sup> JANUARY 2023 | PORT BLAIR, A & N ISLANDS



# TIR YIMYIM

## YIMOBILEM (EDITORIAL)

DIMAPUR SANGTENNÜ, AENJETI (JANUARY) 17, 2022

### Mapaküm Shisaluyim

**T**aküm 2023 küm Ao Kaketshir Mungdang 69 buba lokti senden Akhoya nung asüng nungi tenzüka amongtsü. Iba lokti senden sentong yanglurtemi 'Mapaküm Shisaluyim' ta tanü tensa asen kaketshirtem dak apet omen shimteta lir. Atangji, ojang ana ya asenoki anogo shia jembiba ojangtembo masü, anungji khen anener jungjunga bilemdang nung dang sentong yanglurtem nükjiongji angatetsü. Aji oda, jet ta angatetsü atema 'Mapaküm' tetezü mapa küma inyakba aser 'Shisaluyim' tetezü kaketreju nung mapa inyaksü angazükbatem ta asenoki angatet nunga shitak asütsü südi. Iba sentong yanglurtemia iba omen nungi onük agiteta omulong ka lemsatepba nung, " kaketreju balala nung shisaluyimbaji kuli kaket ka agizükbaji dang masü saka lenla balala nung pai mesüra lai angazükba shisatsü ajanga nübortem nem teyari tulu agütsütetba shisashir ka akümstsü tim. Anungji, shisaluyimba mapang nung alima yimya ka ama zübazüba azüngbaji masü saka tarutsü nung nebur aser kin nem tajangzük agütsütettsüsa pei inyaktetba mapaji alimai nüngdakba aser aginüba asütsü nüngdaker. Aji oda, shisaluyimba mapang angazükbatemji mapa makümstsü aser tejang matangtsüsa süra, ibaji takoksa tulu. Shisaluyimer kaji alima nem tajangzük agütsüba mapa ngutetba, yanglutetba aser zülutetba asütsü tim," ta shisema lir. Iba tangatetba aser nükjiong nung AKM lokti senden nung kaketshirtem den shisalemsateptsü asoshi shisalen teyur tajung jaoka lir. Atangji, kaketshir mungdang nung yimten yimsüsürtem jaoka tajungshi o ka shidaktsübaji masü mesüra mungdang nung kentenmenü sentong ayongzüka longsutepbajia masü saka tanü tensa asen dak apet tebilemstsü onük agiteta shisalemsatepba yagiang asen nübortem tenük lapoktsü. Tanü asen loktiliba nung tebilemstsüji kaketshisatsü angazükner ser nung tazüngdak makaba tebilemstsü masü mesüra senotsü makaba agi makokba tebilemstsüa masü saka asenoki kaketreju nung angazükbatem agi mapa küma meinyakteter, anungji nisung ajak tazüngbo azüng saka kecha memetet, mapa inyak mashi, zünger mapa akümstsü melen mapa maküm kidang mobile amshia kazütepba tebilemstsü ya lir. Ibaji asen lima nung kaketreju nung agütsüba shisalen tai asü mesüra tazünger lanurtem tai asütsü ? Iba tasüngdangba ya asenoki langzütet nung dang, yangji asenoki tagitsü mapa ka tenzüka aotsüsa shisatsü angutsü. Kodang asenoki iba tebilemstsü indang ya shisadangdir, zünger mapa maküm mesüra mapa mangu kazür lanurtem aitsütsüla masü saka tebilemstsüji asenok kaketrejutem nung shisalen sayuyim dak keta lir. Aji oda, tanü tashi asenok kaketreju nung ya E.W.Clark kinungtsü Mary Mead-i sayuba den kasa zülutsü aser azüngtsü sayuba dak alaka asenoksasa ano mapa küma aotsüsabo kecha inyakteta maka. Iba jagi zülua inyaksüba office mapatem nung kar agiadokerbo, tazüngertemji tagir mali kumadoker. Tanü asen lima nung tazünger lanurtem ajak pei tashi aser pei azüngba yari mapa küma odaktsütsü atema tamasa asenok kaketreju nung tanü sayuba tejen shisalen sayuyim ya melenadoktsüla. Aji oda, kaketreju nungbo mapa inaktsü mesayur saka züngtemerbo mapa inyaksü ajungshir ta asübaji, tanur dang jaja aotsü mesayu ser jaja oang ta kangshir amai lir. Atangji, alima nung mapa inyaker meinyakma lir, anungji mapa maka aser mekümtem kazürtemji mapa makaba agi masü saka parnok shisa tenük agi mapa manguba ajanga lir. Ibaji parnok kaketreju nung azüngdang parnoki angazükbaji mapa küma inyaksü mesayuba ajanga lir. Atangji, asüng azüngtsü purtem asoshibo temenu mali, saka tanü tashi nung shirnoksa azüngtsü aser zülutsü koka züngtetogo, pei azüngba kuli kaket kisüng jaki mapa akümstsüba masü saka peisasa mapa inyakyim indang bushia azüngtsü aser angazüktsübaji kanga tongtibang kumogo. Mapa inyaksüba yabo class takdang nung dang masü saka kodang pei alidak peisasa nüngdak reprangteta mapa inyak tenzükdir, ajiang ano shitakba mapaküm shisaluyim asütsü.

# OLEMSABANG

## " LENIR TAJUNG "

- L. Kika Pongener.

Lenir tajung kati ajemalua tila kümter, ajak den sungpo apoteter,  
 Lenir tajung kati nisung ajak den putepa, jungtepa, ammalitepa alir  
 Lenir tajung kati kodanga ken o tangar mezüngmeshi-a mejembir;  
 Lenir tajung kati tarutsü tia indang shisadanga jembir aser inyaker  
 Lenir tajung kati kodanga takok asaa mejembir, saka yimli o jembir.

Lenir tajung kati tangar ajung reprangteter aser tenukmemeremer,  
 Lenir tajung kati tangar majung indang nungsen kodanga mejembir  
 Lenir tajung kati lokti nung shilem ajak pei dang agitsü mebilemer;  
 Lenir tajung kati yak-yakta ain madoker aser pei ain-pong azüoker.  
 Lenir tajung kati teti tangar züngshia, tangar asoshi-a bilema inyaker.

Lenir tajung kati pei kija mulongba agi dang lokti anitsü memeranger,  
 Lenir tajung kati teti tamalen tenzüka arur lenirtem dang akümstsübur  
 Lenir tajung kati teti tamalen tenzüka arur lenirtem nungi shisatsü agir;  
 Lenir tajung kati kodanga tamalen tenzükertemi inyakba mapa maitsür  
 Lenir tajung kati pei jenjang bushia, paji shiba aji angatetsü meranger.

Lenir tajung kati teti ken o tebilemtetba ajakbo mejembi-i soit-a ayur,  
 Lenir tajung kati kodanga takok asa-a taochi maket mapa meinyaker  
 Lenir tajung kati teti pei tenzükbaba mapa aser menden meraketa ayur;  
 Lenir tajung kati rongsen tajangzük nung dang rangloker metenzüker  
 Lenir tajung kati pei yangkü asüngtsü arishia mapa kecha meinyaker.

Lenir tajung kati lokti dang jungrabang, pei kija jurila takoksa aremer,  
 Lenir tajung kati nisung dang masü, saka Tsüngrem dang akümstsübur  
 Lenir tajung kati tangar-i mezüngmeshia sensamasaa-aka aremzüker;  
 Lenir tajung kati teti tangar lenisuba küpok-a tashi anga-a anidakteter  
 Lenir tajung kati pei pur-medemer-i metongshitsüba pelaseta agizüker.

Lenir tajung kati ni alep, ni atsüng, ni tang metet, ta kodanga mejembir,  
 Lenir tajung kati ni, ozü yimer, ozü tsükong, ozü kin ta kecha  
 mesukshir

Lenir tajung kati tangar shilem tashiyim agi rakzüka agitsü  
 memeranger;

Lenir tajung kati kok-er ta-ser tali-tapong tashiyim agi kecha meinyaker  
 Lenir tajung kati ochi mapatem nungbo nungsen arema tasüita  
 nokdaker.

Lenir tajung kati kodanga pei dang metet ama asüküma ulua mebilemer  
 Lenir tajung kati teti pei mapa tashimait mekokmin meyipa reprangshir  
 Lenir tajung kati tangar nem tai tatok agutsüteter aser temeim sayuteter  
 Lenir tajung kati mapabo tulu inyaker, ajisuaka o-bo kanga ajema  
 jembir

Lenir tajung aliba lokti nung nubur aikati dennur, anidaknur,  
 tenzüknur.

**Iba Olemsabang nung lemsaba ken-o aser shisatsü ya iba ocet züluri  
 bilemba ken-o ama tazünger angateta agitsü mepishir**

# Congo nung Tenla ki amakba lendong nung asür 17 jungogo

**January 16, 2023:** Amongnü (January 15, 2023) Congo linük nung bomb amshia Tenla ki ka amakba lendong nung asür 17 jungogo; Kiralongrar telok Islamic State-i iba lendong agütsü ta parnok sasa sangdongogo.

January 15, 2023 nü North Kivu nung aliba Kasindi Lubirha Tenla kidang baptiba tekülem sentong tagidak mapang nung bomb tesashi ka apokba lendong nungji nisung pongu asü aser aika yirua liasü; ajisüaka tang tashi nungbo iba

lendon nung asür 17 jungogo. Anüdoklen Congo nung aliba Kasindi jila nung Protestant Tenla kidang tekülem sentong tagidak mapang nung Improvised Explosive Device (IED) bomb ka pokdaktsüba lendong nung asürtem 17 jungogo aser nisung 20 dak tema yiru.

Iba tatalokba aija January 16 nü Congo Tir, Felix Tshisekedi office sangdong ka ajanga, "Iba tatalokba atema kanga jashir. Linük tebuti, Felix Tshisekedi-i mangyim kibongtem den

tejashi lemsatepba den külemi aibelenertem pua temerenshi agütsütsü ta nangzükogo. Administrative aser security ktdangsertemi yirua alirtem health centers-i anir ogo aser asürtem morgue-i bener ogo," ta metetdaktsü.

Sorkar otongdar, Patrick Muyaya-i sangdong ka ajanga, sorkari iba tatalokba sashia aitsür; iba ya Allied Democratic Forces (ADF) kiralongrartemi Tenla kidang Khristan sensotem anema inyakba asütsü, ta metetdaktsü.

# Sri Lanka Arogoi Tenla kidang bomb toktsüsang aputsü akhanger

**Colombo, January 16 (Agencies):** Sri Lanka nung Arogo lenirtemi yaküm January ita nung linük yimtiba, Colombo nung aliba All Saints Arogo Tenla kidang bomb ka pokdaktsütsü atema bomb yutsür aoba ken o nung aibelenertem aputsüla, ta sorkar nem takhangba agütsüogo.

January 15, 2023 nü Colombo kübok, Borella kiyong nung Amongnü tekülem sentong tembangba sülen putirtem densema Khristan noklang aika adenshia sorkari aibelenertem pua marutetba anema longkak aita liasü.

Khristantemi ozülu balala amer, "Asalentong yanglur tongtiji shiba? Kuli liaka kechiba police-i ola madoker? Aibelenertem anema kechiba meinyaker? Bomb rema yutsüsangji shiba?" ta asüngdanga longkak ait.

Iba Tenla kidang aliba CCTV camera ajanga nisung ka tangoka liasü aser Khristantemi pa noksaji amer longkak ait. Noksa tsünglanglenji yamai zülia lir, "Bomb pokdaktsüsangji ibai lir."

Colombo nung Mass Communications Director, putir Jude Chrisantha-i, 2019 küm Easter Sunday nü kiralongrartemi Tenla ki asem

amakba sülen anogo 1000 ajungba amongtsü anogo asem dang lia bomb ji Tenla ki telung nung anguba metetdaktsü.

"Tia kaa iba bomb ji mapok. Ajisüaka onoki ochi jungkai adoktsü atema jungjunga bushisüngdangdaksüner," ta pai metetdaktsü.

Iba tatalokba sülen melung melemi Tenla kidang inyaker ka den nisung asem apu, ajisüaka ita ka shi dang lirbo court-i parnok ajak chiok. Iba sülen retired doctor kata apu saka pa anema kuli kecha mangu nung chioka liasü.

Chrisantha-i, taoba mapang Senior Deputy Inspector General of Police (DIG) Deshabandu Tennakoon-i inyakba mapaten nungji melung malemtsüsa lir, ta ashi. Cardinal Malcolm Ranjith-ia iba ken o nung tai maket nisungtem pua ayuba atema sorkar aitsüba den külemi yaküm Independence Day benjung nunga shilem magi.

"Iba mapang nungji defense minister, Sarath Weerasekera-i, nisung aika pua asüngdangyatsü ta metetdakja liasü. Inspector General of Police-ia bushisüngdangtsü atema team aika nem lemzüktsüogo ta ashi. Iba sülen küm ka süiogo saka

aibelenertem tang tashi pua maruteter," ta putir Chrisantha-isa metetdaktsü.

CCTV camera noksa nungji, anepdang tebur ka yangkhu bener Tenla ki telung jagi ia yangkhuji toktsür aoer. Iba anogo jakdang kasa nisung jagi Tenla ki anasa itangita liasü.

"Arogo indang CCTV camera ji junga liasü aser iba nisungbaji noksa nung jangjangja angur. Iba nisungba jagi nisung kar tetuyuba nung inyak asütsüa akok," ta Chrisantha-i ashi.

All Saints Arogo nung putir, Jude Sherman Fernando-i, iba bomb ji pokdaktsütsü nükjidong nung Tenla kidang yutsü, ta ashi.

Arogoi CCTV noksaji ktdangsertem nem agüja liasü, ajisüaka ibaji tama mereprangdangi tai maket nisung aika apuba atema Arogo lenirtemi ktdangsertem aitsü.

Borella kiyong nung alir Sujatha Fernando-i, sorkar aser police napronglai ochi mimbangtsütsü atema inyaker, ta aitsü.

"Nüburtem ashioktsütsü makok. Aibelenertemji pua temerenshi agütsütsüla. Ochi obendang agütsütsüla," ta Khristan temeden atema inyaker, Sunil Jayamaha-i ashi.

# ANO GO ABEN TSÜNGREM DEN

## Aieni Aoba Nung Tetsükdaktsü T.Ken 114:1-8

Nai tzüyim jena aoba ngua lir ma? Nai tenemtem san tepung ama pungtenba, tenem tilatem san chanu ama kechi agi pungtendaktsü ngua lir ma? Ibaji Israel Ijip nungi anitetba ken züluri tatsü agi ashiba lir. "Tzüyim agi angu aser jena ao; Yordani meyipa ao... Na alima, Kibuba tsüngdang, Yakob Tsüngrem tsüngdang atentenang. Shibai lung agi tzütu kümdaktsü, züpu lung agi tzüpokdak kümdaktsü" (t.3,4,7,8).

Ken züluri Tsüngremi Temerem Tzüyim lapoker Israel nunger ali takong nung jajadaktsüba ajanga adokdaktsüba ashir. Pai kinji Yordan Ayong ali takong nung jaja tenangzükba Limai anir ai. Pai parnoki lenmang nung ajuruba indang ashi, kodang parnok tzüra. Tsüngremi lungji tzütu kümdaktsü.

Item tajangshibatem nungi asenoki kechi angazüker? Tsüngrem asen taküm timtem aser koda masü tia ajak nung yarir. Kodang nai ne timtem Pa nem agütsür, Pai yarir. Pai kechi inyaker? Ken ken Pai tenokdangtsüji agentsür. Teimla makadak ajak nung Tsüngrem asenok den lir. Israel nung temerem Tzüyim nung koda teyimla makai liasü! Tsükchir sepoytemi parnok sülen liasü; arem, parnok meketa liasü; parnok jakdang tzüyim liasü. Saka jentettsü asoshi Tsüngremi lenmang lapoktsü.

Ken kenttenokdangtsü adoktsür- tenem "tilatem" aser tenem "tulutem" Pai itemji shiruru ama jena odaktsür. Pai ano tenokdangtsüji temoatsütem kümdaktsür. "Pai lungtemji tzütu kümdaktsü aser züpu lung tzüpokdak kümdaktsü" (t.8). Tsüngremi ne timtemji magienra aser meindoktsüra itemji temoatsütem kümdaktsür.

Ne timtem nung Tsüngrem dak amangang. Pai na teimla makadak yaritsü, tenem, tarok ajak nung yaritsü.

# Nigeria nung putir ka rongseta südaktsü



Isaac Achi

**January 16, 2023:** Nigeria nung prangpong amer telok kati Khristan putir ka mi agi rongseta südaktsü aser tanga tatalokba ka nung Khristan pongu puer ao, ta police-i metetdaktsü.

Africa nung nütsüing teimba aliba Nigeria linük nung taruba ita general elections agitsü lia ano tensa tamajungba kümdar; iba linük nung Khristantem kanga reshikangshir.

Nigeria nung Niger state kübok Kafin-Koro yim dak January 15, 2023 anepdang 2:00 ako meta prangpong amer telok kati putir, Isaac Achi'er aliba kidang mi senokja pa rongseta südaktsü.

Prangpong amertem jagi ki telung jagi aitsü merangaka meitetba agi mi senoktsü, ta Niger state nung police otongdar, Wasiu Biodun-i metetdaktsü.

Prangpong amertem jagisa putir, Collins jena aotsü merangba mapang nung pa dak

injang khaloktsü; iba tatalokba sülen Collins ilonga hospital-i anir ao.

Ano tanga tatalokba ka nung, kasa anogo nungjisa Katsina state nung Kankara district kübok Dan Tsauni yim dak prangpong amer telok kati Khristan ki ka amakba sülen nisung pongu puer ao. Parnok tekülem sentong nung adentsü atema Tenla kidangi aotsü lia parnok ajak puer ao.

"Kiralongrartem jagi iba kidang nungjagi Khristan pongu puer ao aser putir ka dak teka nung injang khaloktsüba sülen jena ao," ta state police-i metetdaktsü.

2020 küm December ita nunga kasa district nung prangpong amer telok kati Boarding secondary school ka nungi tebur 300 dak tema puer oa liasü, ajisüaka sorkari jembiba sülen hopta ka dang lirbo chiokadok.



Mumbai nung BMC-i gari lenmang ulushitsü atema St. Peter Arogo indang leper agitsü metetdaktsüba anema January 10, 2023 aonung Mumbai nung Catholic Sabha aser Khristantemi candle amer longkak aita St. Peter's Tenla kidang nungi Kadashwari Mandir Marg tashi longkak aita aodang tangokba noksa nung angur.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Onen**

(n) o agi renema yutsü

\* Nisung aikati **onen** agi marem mapa magizüker.

**Onshi**

(v) lung agi yirutsü (hit by throwing stone)

\* Tia maka pa dak long agi **onshi**.

**OLONG PAITEP # 6401**

	1		2			3		4		5
6								7		
					8		9			
			10							
11										
				12						
13		14		15						16
17										18

**TIPLÉN**

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S \_ \_ \_ \_ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

**LANGTSÜNGLEN**

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. \_ \_ \_ hi - (3)
- 16. Akümüli nungi pilar - (3)

**OLONG PAITEP # 6400 TELANGZÜBA**


**TIPLÉN :**

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen, 14. Ola,
- 16. Talak, 17. Mazük.

**LANGTSÜNGLEN :**

- 1. Tenükjang, 2. Luden, 3. Kiooktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

**Agüja aliba noksa nung meputepi**  
**aliba 11 bushiang**



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela**  
**Tasoba Anogo**



- 1. Tenüng : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**Tripura Assembly elections matongdang 'joint flag march' agi**



**Tripura Assembly elections tiptema agitsü atema 'joint flag march' agiba noksa angur.**

**Agartala, January 16, 2023**  
**(Agencies):** Tripura Assembly elections tiptema agitsü atema Election Commission-i 'violence-free polling process' osang sangoktsüogo.

Iba alizüing atema Hombarnü 13- Pratapgarh (SC) Assembly Constituency nung flag march ka agi. Iba ya West Tripura District Administration aser West Tripura Police Administration lenisüba kübok agi.

Tanü agiba flag march nung West Tripura District Magistrate

Debapriya Bardhan, West Tripura District Superintendent of Police Sankar Debnath, Pratapgarh Assembly Constituency Returning Officer Nirmal Adhikari aser state o central forces nungi ketdangsürtem aser jawantem aden.

Assembly elections tiptema agitsü renemshia iba flag march agir, ta West Tripura district nung District Magistrate Debapriya Bardhan-i ashi.

Vote enoktsürtem asoshi tensa süngjemdaksütsü atema

police patrols senzür, ta West Tripura Superintendent of Police Sankar Debnath-ia ashi.

Polling magi tashi patrolling senzütsü. Tensa meraksatsü atema police-i ozüing alema inyakerkem apu, ta paisa ashi.

Tanü Agartala Hanging Bridge nungi tenzüker Pratapgarh Assembly Constituency kübok tesem balala nung Central aser State Police-i flag march nung shilem agiogo, ta Superintendent of Police Debnath-isa shisem.

**BTR nung Gorkha nungeri Chirang nung lungkak ait**

**Guwahati, January 16, 2023**  
**(Agencies):** Bodoland Territorial Region (BTR) nung Pramod Boro-i BTC ketdangsürtemi BTR Land Mela ayonga amongdang Gorkha nungeri lungkak aita ola adoker.

BTR-i ali ken o tem angatetteptsü atema iba sentong ayonger saka Gorkha nungeri BTR nung local government aitsür.

BTR ketdangsürtemi Gorkha nunger anema inyaksangshir ta parnoki ashi.

Gorkha Students Union of Assam (AAGSU)-i January 15 nü Chirang nung lungkak aita sentong tulu ka ayongzük aser parnoki BTR government dang BTR tanishir Pramod Boro-i nangzükba ama ali temeten ken o angatetteptsü takhangba agütsüogo.

"BTR tanishir Pramod Boro-i lisopurtem aliba tesemtem nung Gorkha nunger 'special protected class status' magizüker. BTR nung Gorkha nunger bendanga amshiba magizüker" ta AAGSU President Arjun Chettri-i ashi.

"Kokrajhar headquarter aser revenue circle offices nung sorkar ketdangsürtemi Gorkha nunger nem timtem agütsür" ta pai ashi.

"Onok nem ali temeten magütsü tashi onoki ola adoktsü. Pramod Boro-i sorkar akümtsü tashi mangudang onok dang BTR Gorkha nunger ali temeten angatetteptsü ta nangzük saka küm 3 süiaka iba ken o ano metembang lir" ta Arjun Chettri-isa ashi.

BTR tanishisangi iba ken o atema meinyaktetra menden nungi alutsüla aser state sorkari

Bodo nunger tesem nung Gorkha nunger ali temeten atema inyaksüla, ta paisa ashi.

"Onoki tesüiba küm 17 tashi onok temeten meshia arur. Tang ya onoki Pramod Boro dak tamang kaa pa shimtet, saka pai Gorkha nunger anema inyaksangshir" ta Chettri-isa ashi.

BTR sorkari ali ken o angatetteptsü atema Land Melas ayonga agir aser onoki ken o 15000 tashi angatettepogo, ta Pramod Boro-i ashi.

BTR region nung Gorkha nunger tribal belt nung densema lir aser parnok indang onük ajak sorkari lateta aliba temzüng ama angatetteptsü ta Boro-isa ashi.

"Onoki ano February 3 nungi 13 tashi BTR land Mela tanabuba shilem ayonga agitsü" ta paisa shisem.

**X LENSAR ZUNGA LONGSA**  
**OPEN FUTSAL TOURNAMENT 2023**

**1st Prize: 30,000**  
**2nd Prize 20,000**

**INDIVIDUAL PRIZES FOR !!!**

**Best Player**  
**Highest Scorer**  
**Best Goal Keeper**

**DATE 30-31ST JANUARY**

**Entry Fee Rs. 2000**

**Venue LONGSA FOOTBALL GROUND**

**LIMITED SEATS. REGISTER NOW !!!** Contact us: 8798123453

**Assam Rifles-i Mizoram nung Myanmar nunger 2 apu**

**Aizawl, January 16, 2023**  
**(Agencies):** Mizoram nung Assam Rifles aser Customs Department-i osang tejangja ka angazükba sülen mita aodang tapoktsü aika ngutetogo.

Iba dak sendakba nung Myanmar nunger ana puogo aser tena ket nungi detonators 100 aser detonating cord 8 rolls angu.

Nisung ana den tena ket nung apuba ajak Customs Department, LCS Champhai aser police ket nung agütsüogo.

Tesüiba ita ishika tsüingda Myanmar nung mitkartemi civilians amakba ajanga Myanmarese refugee aika Mizoram-i arua jenoker.

Myanmar nunger ket nungi ozüingi memelaba apuba ya tang mezüing masü. January 13 nü Mizoram kübok Luimawi nunga Myanmar nunger ka dena nisung 5 apu aser parnok ket nung heroin aika bena liasü.



Tokyo nung küm tenzüker mapa inyakba anogo mezüngbuba nung nüburtemi Kanda Myojin tekülem kidang sarasademba noksa nung angur. Japan nung New Year indang business day mezüngbuba liasü. Maparen balala inyak tenzüker anogo mapa inyaker tem temeshi tesemtemi oa temoatsü meshia sarasadem. Tokyo nung aliba Kanda Myojin tekülem ki ya item tesemtem rongnung ka lir, kong küm tepiyong asoshi nüburtemi temoatsü meshia liasü.

## Tetsür temedenji tongtibang masü: Taliban

**Kabul, Aenjeti/January 16 (Agencies):** Tetsürtem university balala aser NGO tem nung inyaksü tenokdangba agütsür aliba mapang ka nung Taliban-i ashiba agi, tetsürtem nem tenokdangba agütsür aliba agintsüji par telok atema tongtibang masü.

Taliban otongdar Zabiullah Mujahid-i ashiba agi, parnoki Islamic ozüng nung mapetba inyakym kecha memelatsü aser tetsürtem nem tenokdangba agütsüba ya Afghanistan nung temzüng ozüng dak ajemdaker inyaksangshitsü.

"Islamic Emirate-i ken o ajak Islamic Sharia dak ajemdaker inyaksangshitsü meranger aser sorkari linük nung Sharia den mapetba inyakym kecha inyaksü asoshi temelaba magütsütsü," ta Zabiullah Mujahid-i ashi.

Teyari agütsüba telok balala nung tetsürtem shilem magitsü atema Taliban-i aniba sorkari December 24 nü tenokdangba agütsür liasü. Ita ka tejakdang tetsürtem university tem nung mazüngtsü atema tenokdangba agütsüba sülen iba ya sangdonga liasü. Tetsürtem March ita nungi high school nung azüngtsü asoshi memelai arudar. Parnokisa tetsürtem dang lokti nung senzüba mapang temang ajunga süoshi agi sobubanger senzütsü tetuyuba agütsüo.

Iba tenokdangba agütsür aliba ya agindaktsütsü atema Afghanistan nung Taliban sorkar nongshitsü atema bangzüng ka yanglutsü asoshi US-i UN Security Council nongshia liasü.

Zabiullah Mujahid-isa, Afghanistan indang partner aser international aid organization tem dang linük nung tamangba yimsü agi akhangba ya angatetsü aser humanitarian teyari ya yimden yimsütsüba den mezüpelang mesüdaktsütsü mepeshia metetdaktsüo.

US, Britain aser France densema Security Council züngsem 11-i tetsürtem nem tenokdangba balala agütsür aliba agintsü asoshi Taliban sorkar nem temepishiba ka agütsüo.

Ajisüaka Taliban sorkari item tenokdangbatem agintsü asoshi tejangraba aliba kecha mesayur.

Kasa mapang nung taoba Afghan MP ka aser la bodyguard Kabul nung lar kidang khasetba osang Afghan police-i metetdaktsüo.

Arishi küm 32 tain Mursal Nabizada ya 2021 küm August ita Afghanistan-i sorkar atsüngba sülen Kabul maitüsü aliba tetsür MP ishika rongnung ka liasü.

Deobarnü iba lendong nung la adianu aser security tangaka yirua liasü.

Taoba mapang külem tenzükertemi Nabizada ya Afghanistan atema tetsübu melei nokdaker ka ta ashi, shibai linük toktsür aotsü asoshi maongka nguaka maotsü telemetba agia liasü.

Kabul police otongdar

Khalid Zadrani ashiba agi, security forces-i iba ken o süoki ia bushisüngdang tenzüker.

Taoba MP Mariam Solaimankhil-i ashiba agi, Nabizada ya lenmang mesapoker ka, shibai lendongbang nunga la tangatetba aser tamangba nungi mainshi-i akang akanga nokdakago.

"Afghanistan toktsür aotsü atema maongka agüjaka lai linük toktsür moi lar nüburtem atema raratsü asoshi shim," ta lai Twitter nung zülutsü.

Nabizada shiba Nangarhar province nungi lir, la ya Kabul nungi 2018 küm parliament züngsem akümtsü atema shima liasü aser Taliban-i sorkar matsüng tashi iba mapa bena liasü.

La parliamentary defence commission züngsem ka liasü aser Institute for Human Resources Development and Research nung inyaka liasü.

Taoba küm Taliban-i sorkar atsüngba sülen mapa balala nung inyaka aliba tetsürtem aika linük toktsür jenaogo.

## MULUNGNEN O

1932 - 13.01.2023



Ojala **TSUKJEMLEMLA** (Mopungchuket), 13th January 2023 asükhü anogo nungi kija, kibong, lokti balala shirnokisa nübu, rongsen, sarasadem aser shisatsü agi yaria aruogo, nenok ajak dang onoki kangasa pelaba metetdaktsür.

Nenok temeim aser mapa tajung asoshi kanga dang pelar. Tsüngremi nenok ajak teti moajangma.

**Temeim Chirnurtem, Semchirsemmurtem & Kinungertem.**

## MULUNGNEN O



ASO : 3rd March 1951 - ASÜ : 12th January 2023

Onoki akümtsüpua aruba Tsürabur asür **Pongyanger Tzüdir**, Yim Molungyimsen, Talidak Luyong, Tuli. 21st November 2022 anogo nung kanga tang meimlai aiba tashidak tolu agi menepa atok. Yamaji meimlaba tashidak tolu agi meneper anüpalua aruba anogo mapang nungi tasüba anogo tashi ozüdak malangba meteta aser memeteti aliba nüburtem shirnoki sarasadem nüksü den nübo aser rongsen agi yaritepogo, teyariteper ajak tang kanga pelaba iba sapang zülü ajanga lemsateper. Nenok mapa tajung asoshi ozüi kija kibong aser lokti tentet ajak dangi tsüngdong arua meshitetba asoshi sasa bilemer, saka asen teyanglur taküm Tsüngremi nenok temeim mapa tajung amajok kodanga masütsü ibaji ozü ochi tamang teyimla.

Item dak alakteta kija aser lokti tentet tenüng kar metetshi-melitet nung item lokti aser kija kibong tenüng kar yamai agütsür.

1. Luyong Baptist Arogo aser ministry ajak.
2. Luyong Village Council.
3. Molungyimsen Rionsanger puto.
4. Molungyimsen Baptist Arogo aser ministry ajak.
5. Ao Union Tizit Area.
6. Tizit Town Ao Baptist Arogo aser ministry ajak.
7. Aliba Senso Fellowship Tuli.
8. Dimapur Molungyimsen Senso Sanger aser Anükapang, Tetsü tamu.
9. Dr. Athikho aser Staff, Eden Medical Hospital, Dimapur.
10. Dr. Supongmenla Walling, Dimapur.
11. Shri. Paiwang Konyak, Hon'ble Minister, Government of Nagaland.
12. Shri. Pangjung Jamir, Director Land Resources, Govt. of Nagaland.
13. Dept of Handloom & Handicrafts Development Corporation Dimapur Nagaland.
14. 21 Tuli A.C.C.C.
15. Luyong Student Union.
16. Obo Imkongmar Tzüdir Semchir Telongjem.
17. Co-operative Society Luyong.
18. Pensioners Association Mkg. Dist. Tuli Unit.
19. Imlikumba Zünga, Molungyimsen.

~ Temeim Kinungtsü, Chirnur, Semchir, Adianu, Anükapang, Tetsü-tamu.

## MENUNGRA BILEMTETER

Lt. Latongmongla

Died on : 17.01.2021

Oja,

Onoki na teti menungra bilemteter. Ne meim aser sarasadem onok den teti alir. Nai iba Lima toktsür küm ana süiaka, ne sayutsüngi aser Lai tesayuba agi anak taküm nung anogoshia len anir. Onok asoshi Tsüngremi na oja asütsü agütsüba asoshi teti pela alir.

Kenu anogo kodanga mepilaba Kodak Lima nung ajurutsü.

**Temeim kinungbo, chirnur aser semchirtem.**



## OFFICE OF THE CLARK MEMORIAL HIGHER SECONDARY SCHOOL, IMPUR SITUATION VACANT

1. Montessori Teacher (1 Post) : Required qualification 12+ & above, Montessori trained from a recognised/registered institution.
  2. Hindi Teacher (1 Post) : Undergraduate/ Diploma and above qualification in Hindi from a recognised Board/University with PSTE/D.El.Ed
- Interested candidate may send the complete Bio-Data through the school mail provided on or before 31st of January 2023, addressed to Principal CMHSS, Impur.
- Email : cmhssimpur1895@gmail.com

Sd/- **CHUBAINLA, Principal CMHSS, Impur**

## 31 buba MDCA Inter-club T20 asayaba osang



**Mkg., Aenjeti/January 16, 2023 (TYO):** 31 buba MDCA Inter Club T20 Cricket Tournament Titans-i koker külen senpet agizükang tayongertem den külemi tangokba noksa nung angur. Final match nung Titans-i A&KCF madak takok nguteta taküm parnoki iba asayamung marok aben. Tanü iba asaya nung Mokokchung ADC, Chumlamu Humtsoe match patron liasü. Iba asayamung ya Mokokchung District Cricket Association-i Jan 9 nungi tenzüka Imkongmeren Sports Complex, Mokokchung nung ayongzüka liasü. Mokokchung, 16th January, 2023.

### Nija senpet agizükertem:

Individual Best Batsmen	: Nripen Rai 201 Runs (A&KCF)
Best Bowler	: Moatemjen 7 Wkts (A&KCF)
Man of the Tournament	: Nripen Rai, 201 Runs with 2 Wkts (A&KCF)
Most Promising Player	: Amongti (Sovran)
Spirit of the Game	: Jovial Cricket Club
Man of the Final Match	: Basant of Titans.

## S. Africa-i Test aser overs team tem atema coach tasen shimogo

**Aenjeti/January 16, 2023 (Agencies):** South Africa-i limitet overs team coach mapa abentsü atema Rob Walter aser test team coach asütsü Shukri Conrad shimogo, ta ketdangsürtemi Hombarnü metetdaksü.

Mark Boucher, shiba format ajak indang head coach liasü, pai taoba küm Australia nung Twenty20 World Cup tembangba sülen mapang toktsü aser Indian Premier League nung Mumbai Indians nung densemogo.

South Africa nunger Walter ya taoba mapang national team indang strength & conditioning specialist liasü, saka taoba küm tenet tashi New Zealand domestic cricket nung coach

mapa inyaka aruogo.

Conrad ya South African domestic cricket nung tajangshiba aika bener aliba head coach ka lir aser tawa pa lenisüba nung national Under-19 asaya liasü.

Pai South Africa test team head coach mapa agizükba sülen mezüngbuba küm pa asoshi mapa tayong asütsü, kechiyong South Africa pur 2023 küm Test asaya asem dang asayatsü lir. Test team ya kidang West Indies den February 28 nungi asaya ana asayatsü lir.

Coach anaprongla yagi February 1 nü mapa agizüksü.

South Africa indang director of cricket Enoch Nkwe-i, January 27 nü nungi tenzüka

England den kidang ODI asaya asem asayatsü aliba atema interim coach shimtsü, ta jangjashitsüogo.

"Tena lenir tajung lir aser South African cricket tejakleni anir aotsü atema parnok sentong tejangja lir," ta Nkwe-i osangbenertem dang ashi.

Nkwe-i ashiba agi, 2027 küm50-overs Cricket World Cup nung takok ngua asayatsü atema tamendakdak akang akanga yanglutsüji kanga tongtibang, koba South Africa, Namibia aser Zimbabwe nung asayatsü lir. "2027 World Cup ya kechi südir süaka akoktsüla aser iba atema inyakyim tajung ka amenoktsü nungdaker. Ibaji onok nukjidong asütsü," ta pai ashi.

## 24buba N.B.E. Zhuikhu Memorial Trophy Gold Cup tembangogo

**Dimapur, Aenjeti/January 16 (TYO):** Western Sumi Sports Association-i ayongzüka 24buba N.B.E. Zhuikhu Memorial Trophy Gold Cup, Shokhuvi yimtsüing (Aqahuto Area) nung Hombarnü tembangogo.

Asayamung shibangba sentong nung Secretary General, JDU, Nagaland Kitoho S Rotokha alaketa jaoker liasü.

Sentong nung O jembiba mapang Rotokha-i, iba ground (Shokhuvi) nungi lanurtem aika anitetogo aser parnok state aser national jenjang nung toktepogo. Western Sumi nungi sempet tajung aketba asayartem aika national aser state jenjang nung tokteptsüsa sempet lir saka practice maliba ajanga metoktepteter, ta ashi.

Khelo India ya lenla balala nung infrastructural development aser training agütsütsü asoshi lir saka sorkari

kar dak dang rangloker inyakba ajanga jung junga benoka inyaksangshi mesüteter. Iba ya Nagaland nung asaya balala renlokyonga maoba kuli rongnung ka lir, ta pai ashi.

Paisa, iba amala asayamung ayongzüka asayaba nukjidongji national jenjang nung dang masü saka international jenjang tashi nung asaya ajungkettsü atema asütsüla, ta shia pai lanur asayartem dang parnok sempet tali arantetsütsü aser asaya ya mapang intoktsüba atema dang masayatsü ayongzüka. Paisa, takok angutsü atema temulungtetba tulu nung libaliri azüoka inyaksangshitsü nungdaker ta ashi.

Maneni pai asayartem dang international jenjang nung nungtugu asayar akümtsü atema nukjidong tulu ayutsü ayongzüka liasü.

Meranga inyakba indang

jembiba mapang Rotokha-i lanurtem dang mapa kechi südir süaka süoki ia agitsü aser lokti nongiter kaka akümtsü ajungshia liasü.

### Asaya balala nung takok angurtem:

BADMINTON (WOMEN)	Champion= HASSA Tema
	Runner Up= Shokhuvi team
	Best Player= Toli Assumi, HASSA
BADMINTON (MEN)	Champion= East Dimapur (B)
	Runner Up= East Dimapur (A)
	Best Player= Anahito Aye, East Dimapur team
VOLLEYBALL (MEN)	Champion= Kikheyi Team
	Runner Up= HASSA Tema
UNDER 16	Champion= HASSA Team
	Runner Up= Khaghaboto team
FOOTBALL	Champion= Pimla team
	Runner Up= Kuhoxu Team.

## FKF-i football asayar aser caoch

## 16 nem tenokdangba agütsü

**Aenjeti/January 16, 2023 (Agencies):** Match-fixing dak sendakba nung Kenya football federation-i asayar 14 aser coach ana asaya nungi suspend sütsüogo. National league nung ochi mashi inyakyim benoka inyakba osang ka angazükba sülen iba jenjang agia liasü.

Hokolbarnü suspend sütsüba asayartem rongnung parnok trokbo Zoo Kericho FC nungi liasü. Iba club ya match-fixing nung shilem agiba FIFA indang integrity unit-i 2021 küm ngutetba sülen Kenyan Premier League nungi mintoka liasü.

Football Kenya Federation (FKF)-i ashiba agi, reigning Kenyan premiership club Tusker nungi asayar ka densema ken o nung aija alirtem ken o kanga junga bushisüingdang masü tashi asaya nung shilem magi atatsü atema tenokdangba agütsüogo.

"Match fixing inyakyim balala nung asayar aser ketdangsürtemi shilem agiba indang miim osang Football Kenya Federation-i agizükogo," ta organization-i parnok indang website ajanga metetdaksü.

"League meraket kümzüka ayutsü atema federation-i, FIFA aser FKF integrity

department-i tang ken o bushisüingdanga aliba asayartem tangsa tang asaya nungi anena atatsü atema tenokdangba agütsüogo," ta kasa sangdong ajanga metetdaksü.

Organization-isa, FKF züngsem ajak dang asaya nung shilem magitsü atema tenokdangba agütsür aliba mapang item asayar aser ketdangsürtem den kecha tesendaktep mayutsü tetuyuba agütsüogo.

2020 küm February ita FIFA-i, league asayatem fix asütsü merangba atema Kenya nunger asayar pezü asaya nungi anentsü. Parnok rongnung kabo taküm tepeyong football asaya nung shilem magitsü atema tenokdangba agüja liasü.

Kasa ken o nungsa Kenya nunger referee pongu mapa nungi anenja liasü.

Senotsü shidak mamshiba atema 2022 küm February ita FIFA-i tenokdangba agütsüba sülen Kenya November ita nungi international football nung shilem agi tenzükogo.

2004 kuma sorkari minprongba atema FIFA-i Kenya nem tenokdangba agüja liasü, ajisüaka linüki inyakyim melenshitsü asoshi agizükba sülen iba tenokdangba agütsür aliba ya agin.

## Nick Kyrgios Australian Open nung masayatsü

**Aenjeti/January 16, 2023**

**(Agencies):** Nick Kyrgios temekok yiruba ajanga Australian Open nung masayatettsüsa akümba Hombarnü sangdongogo. Pa mezüngbuba round asayatsü anogo ka lia iba osang sangdongog, kechiyong pa temekok yiruba atema arthroscopic surgery agitsü nungdaker.

Arishi küm 27 tain Kyrgios ya taoba küm Wimbledon kija asaya nung runner-up liasü aser pai Thanasi Kokkinakis den külemi 2022 küm Australian Open tebur tarep asaya koka liasü. Kyrgios ya Australia nunger tebur asayartem rongnungi iba asayamung akoktsü imlar rongnung tashi taitba asayar liasü. 1976 küm nungi tang tashi nung Australia nunger asayar katidanga iba asayamung koka mali.

Taküm küm atema mezüngbuba Grand Slam tenzkba anogo pai Melbourne Park nung pa indang physical therapist Will Maher den külemi osangbenertem den sensaksemba mapang iba osang sangdonga liasü.

"Kü indang career nung asayamung rongnung

tongtibangtiba ka nung masayatetba atema kanga mepelar," ta pai ashi. Melbourne nung asayamung atema seed 19buba asayar ya Mongolbarnü mezüngbuba round nung Roman Safiullin den asayatsü liasü.

Kyrgios ya tennis asayartem rongnung pai bilemba matidaki jembiba asayar ka lir aser iba ajanga pa mapangshia mepetmesüi aier. Pai pa mental health indanga kecha mimshia meyui jembio.

Australian Open ya Kyrgios' indang official season debut asütsü liasü. Pai Hokolbarnü Rod Laver Arena nung pa temekok tendangtsü atema Djokovic den exhibition asaya ka nung shilem agia liasü, saka temekok agi maneni timtem agüja liasü.

Kyrgios-i temekok nung timtem aliba ashishiba sülen MRI agi aser iba ajanga cyst ka aser lateral meniscus ligament tera shisar aliba ngutetogo, ta Maher-i ashi. Pa yirur aliba ya kanga tamajungbo masü aser pa March ita California nung asayatsü aliba Indian Wells asayamung nungbo shilem agitettsü, ta paisa ashi.

## **BILEMDANGANG**

**"Amajok watidak nü mapang telalu."**